

CHINESE-JAPANESE LIBRARY  
HARVARD-YENCHING INSTITUTE  
AT HARVARD UNIVERSITY

12

MAY 11 1951

579117 / 1142

渡	邊	家	文	庫
漢	書	集	別	類
四	七	七	〇	號
二	四	冊		
淡	函			
三	架			

帶經堂集卷五十

歙門人程哲校編

新城王士禛貽上

漁洋文十二 書後跋

書殿閣大臣年表後

予觀殿閣部院大臣年表至天啓癸甲之際未嘗  
不廢卷而歎也嗚呼明之亡決矣先是壬戌歲大  
司寇王公紀及諫官侯震暘等交章論大學士沈  
漼罷之芮城雖與同罷然衆正在位勢猶可為而  
御史劉璞已恐有進紹述之論者其在易同人之  
九三曰伏戎于莽升其高陵此一時也至癸亥正

渡邊千春遺愛書



三五五十一  
月顧秉謙相甲子正月魏廣微相於是福清蒲州  
相繼逐趙忠毅高忠憲以謝應祥事得罪去是時  
楊忠烈二十四大罪之疏適上擊逆璫者章滿公  
車奄遂殺萬公燦以立威廣微呈秀之黨望風羅  
織而清流之禍成矣其在易之否曰內陰而外陽  
內小人而外君子此又一時也諸君子有類族辨  
物之明有不亂羣之守有田狐射隼之志而無遇  
主于巷之機生謫窮荒歿填牢戶元氣旣剝國運  
隨之雖以愍皇帝剛健足以撥亂反治而卒無救  
於危亡悲夫按家乘先伯祖太師公以甲子三月

致仕崇禎元年戊辰八月起田間加少師出鎮宣  
雲皆與表合方是時吾家諸祖父列仕版甚衆而  
先祖方伯公以丁巳京察謫叔祖中丞公爲應天  
巡撫劾織監李實吳江貪令曹欽程光祿公官保  
定同知不拜璫祠罷官考功公與太師公同列名  
東林籍貫同志錄點將錄諸書無一人比匪隳其  
家聲者可謂難矣爲子孫者其可不勉與

書劉龔冢碑後

崇禎九年秋廣州城東二十里北亭洲田間有雷  
地奮而成穴耕者梁某投以石空空有聲內一雄

三才七十七  
雞其中逾夜雞鳴亾恙乃發之有金人如翁仲者  
數枚各重十五六斤有二金像冕而坐者筭翟如  
后妃者各重五六十斤地皆金蠶珠貝旁有鏡一  
光燭穴中寶硯一硯池中有玉魚能游泳他異物  
不可指識者甚衆梁攜歸光動四鄰鄰人覺而爭  
往遂白之官有司親臨發之隧道如城高五丈餘  
深三丈中有碑乃偽漢劉龔冢也文曰維大有十  
五年歲次壬寅四月甲寅朔廿四日丁丑高祖天  
皇大帝崩於正寢粵光天五年五月癸未朔十四  
日丙申遷神於康陵禮也文多闕不盡載末云翰

林學士知制誥正議大夫尚書右丞賜紫金魚袋  
臣盧應初撰并書按五國故事龔天福壬寅歲四  
月避暑甘泉宮未幾殂通鑑及十國春秋皆作三  
月據碑當以五國故事為正十國春秋又云康陵  
在興王府城東二十里之漫山陵中以鐵錮之堅  
不可啓光天乃龔子玠年號玠立僅二年為其弟  
晟所弑即改光天二年為應乾元年按光天無五  
年十國春秋稱殤帝光天元年八月葬天皇大帝  
於康陵與碑皆不合又考偽漢諸臣列傳止有盧  
膺仕巖為工部侍郎才藻俊茂晟時拜中書侍郎

三萬十  
同平章事無應初名識之以俟博雅者考焉

書先考功兄年譜後

右先兄西樵先生年譜一卷士禎忍涕敘述什得五六蓋先生嘗欲自為之而未暇以為譜之作先生志也先生生平言行信於家庭無間於鄉黨寮友此譜多未及詳約而言之其不愧古人者有數端焉孝事二親下氣柔色終身無跛倚唾涕一也友愛諸弟疾痛苛癢若身受之文章經術兄道兼師二也平生不愧屋漏所為無不可以告人三也與人交不可得而親疏久而敬之所謂澄之不清

撓之不濁四也讀書味道蕭然終日或蘓蘇不爨不改其樂終身未嘗問家人生產五也樂易坦白胸無城府籬棘而是非可否之介屹然如山岳之不可奪六也家法恭謹恪守勿失出則徒步閭里長老不知內史貴人七也不謁令長不以竿牘溷公府八也居京師足未嘗至賢人之門逢掖過從如遊蓬戶九也性耽山澤如陶貞白入官松風之夢固在垂組影纓寄焉而已十也文章名世而單門晚生一語之工心折下之不惜口齒為之獎成名譽十一也清真簡遠吐納風流終日無俗語十

三十九十三  
二也兩居銓曹家徒四壁立負郭之田無增於舊  
十三也屢更艱疏天鈞泰然深得中庸素患難之  
旨十四也居母喪一循古禮未暮竟以身殉十五  
也若其方正廉直外和中介卓然有古名臣之風  
解巾登仕首尾塵十載屢遭顛踣不獲少伸其志  
可謂窮矣不得已而託文章以自見時時太息於  
千秋萬歲誰定吾文之言嘗謂漢隋以來藝文經  
籍諸志及通志通考諸書所載有著書千百卷不  
傳一字者孫樵盛推賈希逸歐陽永叔言鄭條為  
古文在尹師魯前而二君文采寥寥於後世名豈

足恃邪今先生著書惟然脂集二百三十餘卷條  
目粗就餘如讀史蒙拾朱烏逸史賓實別錄閨閣  
語林南榮曝餘錄羣言頭屑諸書率未卒業詩則  
世多知之者顧傳之久近有物司之追維夙昔之  
言良可悲已不孝士禎與先生為兄弟四十年矣  
撫我則兄誨我則師真有如子由所云云者先生  
既歿禮部公泣謂士禎曰而與而兄實有牙生輟  
弦之痛豈但鶴原之悲也因而慟絕士禎迷罔之  
中略次生平出處如左冀世有史筆或傳之獨行  
或錄之文苑儒林庶幾九原可作歿且不朽獨是

先生孝友忠信守死善道而卒顛頓軼軻年不及  
五十以歿皇甫湜悲汝南子桑云謂善之福夷死  
何餓謂惡之禍跖歿何肥悠悠蒼天其可問哉荀  
卿有言死而不朽者壽先生求仁得仁一死固已  
不朽禎將援此以少紓其悲焉然以先生之孝友  
忠信而獲報於天者竟如此矣復何言哉復何言  
哉

王東臯先生紀略書後

古人於師弟子最重東漢以來猶有古之遺風歿  
生患難之際去官行服伏質上書者比比而有如

朱博之於陳咸廉范之於薛漢是已東臯先生一  
代名臣未究其用以歿天下惜之而遺孤又孱弱  
其門人白子仲調官京師聞赴既為位而哭又於  
慈仁僧舍要經受唁予與戶部侍郎魏公學士葉  
公言之每共相歎息嗚呼古道之不行久矣白子  
既力行古道於舉世不為之日而又懼其師之言  
行湮沒而不傳於後於是又為紀略一卷既以報  
其師於地下且以慰其垂白之母煢煢之孤而將  
來國史之書太常之采與夫天下後世慕東臯  
先生之風而思論其世者皆於此有考焉又不僅



師弟子之誼而已也

跋古周易

按張景春吳中人物志云吳人傑字斗南崑山人登淳熙進士第官國子學錄嘗講學朱子之門所著有古易十二卷周易圖說樂舞新書廟刹罪言郊祀贅說鹽硃論丙丁各二卷禘祫縣叢書三卷集古易尚書洪範辨圖一卷兩漢刊誤補遺十卷并行於世此其平生著書之一耳

跋易雅

按袁伯長清容集載其先人師友淵源錄云趙汝

謀善湘子為宰相壻早退自修精易象有易敘叢書官至戶部侍郎晚歲以理財進用失士譽所謂叢書豈即此邪

跋左傳補注

趙子常先生經學為明初儒林之冠少受春秋於黃楚望著春秋屬辭十五卷宋文憲公亟稱之別著集傳十五卷師說三卷而此左氏傳補注十卷海鹽陳緯度光緝遺子舊刊本古雅可寶惜因與新刻東山集同藏篋中緯度博雅多讀書嘗著竹素辨譌二卷客歿京師殊可哀也

跋玉楮集

宋岳亦齋所著書有程史愧郊錄金陀粹編各若干卷其詩名玉楮集者予夙昔聞之而未見康熙乙卯春二月與張子杞園同客青州每獲祕本輒共欣賞此書其一也集中贈李微之祕監詩自注云微之以史館牒來索予所撰東陞筆略云云亦不及見不知尚傳於世否俟更訪之

跋杼山集

唐釋晝杼山集十卷有湖州刺史于頔序首載勅浙西觀察使牒湖州當州皎然禪師集牒得得集

賢殿御書院牒前件集庫內無本交闕進奉牒使請速寫送院訖垂報者牒州寫送使者故牒貞元八年正月十日牒都團練副使權判兼侍御史李元使潤州刺史兼御史中丞王緯按唐六典集賢殿學士掌刊緝古今圖籍凡天下圖書之遺逸賢才之隱滯則承旨而徵求焉當時一衲子之集至勅觀察使牒本州寫送御書院其於文章之事可謂勤矣後世亦豈易得哉此集為吳郡馮舒鈔本詩七卷碑誌書序雜文二卷聯句一卷按張睿卿所編吳興五家集僅四卷篇目略同

跋笠澤叢書

康熙甲子春予在成均從溫陵黃俞邵借笠澤叢書係江西士夫家藏鈔本以甲乙丙丁為次喜其古雅可寶惜錄而藏之然舛午甚多如乙集中寒泉子一篇脫落竟至十餘行頗取文粹補正又附錄小名錄序一篇夏五月端午後二日僦人顧淵自虞山來得毛辰斧季書見寄此本蓋宋元符蜀人樊開本而都穆重校刊者二本編次篇目略同惟耒耜經江西本分耒耜數另為一篇而蜀本甲集有樊序丁集末有王益祥陸德原及玄敬三跋

又有續補遺賦四篇皆江西本所無又紀錦裙在丙集迎潮詞在丁集築城詞在補遺中與黃本次第小異耳予舊藏皮襲美文藪舊版本獨恨不得叢書合為一函今一旦獲雙璧快何如邪因揮汗志之時陪 祀方澤齋宿國子監東廂書

跋河南集

尹師魯為古文在歐陽子前前乎師魯者又有穆修鄭條柳開輩開河東集予從溫陵黃俞邵氏于頃堂鈔得藏本穆修參軍集則代州馮秋水方伯順治間刻於金陵唯鄭條集未之見然二集文皆

疎拙而石守道徂徠集尊開之學不啻李漢輩之  
於昌黎此不可曉也師魯河南集二十四卷詩一  
卷餘皆雜文前有范希文序蓋北宋人文章之傳  
於今日猶得見其全如此集者塵矣惜寫本多魚  
豕之謬恨不得別本讎對之姑校正其可知者餘  
則闕疑不敢妄有竄改云

### 跋武溪集

宋余襄公靖武溪集二十卷成化間丘文莊所得  
祕閣本嘉靖中衡陽劉穩重刊之韶郡者有宋尚  
書屯田郎中周源序予過曲江秦令熙祚以此本

見遺云購之一老儒家秦山西聞喜人其祖為先  
太師門生有孔李之誼云康熙二十四年孟夏記  
於韶石舟中

### 跋河東集

宋如京使柳開仲塗文集十五卷附行狀一卷門  
人張景所編亦名河東先生集其文多拗拙石守  
道極推尊之徂徠集有過魏東郊詩一篇至上擬  
之堯舜臯夔伊呂下擬之遷固通

文中

愈又嘗作

怪說三篇以詆楊文公比之狐媚梟鳴噫亦諄矣  
湘山野錄云景字晦之避難逋竄改姓名曰李田

三  
卅  
所至題曰欲識我蹤跡一氣萬物母景作柳集序  
首云一氣萬物之母也故云然

跋未備五經注疏

近日士君子留心經學者頗有其人宋元諸儒撰  
述亦漸出餘姚黃黎洲宗義晉江黃俞邵虞稷聞  
見尤富此未備五經注疏一卷乃鈔自朱竹垞太  
史者太史手鈔經學書多至百種此蓋較西亭王  
孫授經圖所載而未備者然亦可謂博矣竹垞又  
著經義存亡考若干卷聞已成書惜未之見

跋石田集

伯庸家世雍古部人至其父始家光州為御史嘗  
劾姦臣鐵木迭兒十大罪以勁直聞非僅文章之  
士也然史稱其文宏贍而精核以先秦兩漢為法  
詩圓密清麗大篇短章皆可傳其詩文蓋有過人  
者方山比部鈔石田集文與詩凡若干首予借觀  
因題其端俟他日更訪全本

跋元遺山詩

張祜詩人生只合揚州死禪智山光好墓田元遺  
山擬作兩句云人生只合梁園死金水河頭好墓  
田蓋哀金宮人之被俘擄者亦如宋末孟鯁折花

三才  
漁洋文卷十一  
怨鮑輓重到錢唐諸作諷謝太后北行之意與張  
詩語同而意義迥別也

跋葉文莊公集

葉文莊公集流傳絕少世所習見止水東日記若干卷焦澹園經籍志載涇東文集四卷不知何據詢諸今侍讀學士訥菴先生云公集未嘗板行也此集學士家藏本不釐卷次後有族譜一卷宣鎮志諸序一卷別有涇東小稿一冊文間有異同塗竄甲乙皆公當時手筆卷首有巡撫宣府關防蓋公天順八年自兩廣移鎮宣府後手稿也史稱公

文章似歐陽文忠生平慕范文正之為人行墨之間鬚髯可見予讀公文獨愛其和平易直得古人修辭立誠之旨公之世後於東里先於西涯守溪其文亦與數公相上下蓋宣德以後弘治以前先輩文章師承大抵然也予總角知慕公之風愧固陋無能執校讎之役敬跋數語以復於學士聊致私淑之意云

跋金薤琳琅二則

都玄敬在成弘間號博雅著書甚多金薤琳琅其一也其書在歐曾呂趙之間頗稱精核予購之有

年矣康熙二十四年張子石宗始為予得之吳郡  
予時自東粵祭告歸復命京師天津舟中與坐  
臥者累日近人所撰如趙岫之石墨鐫華郭景昌  
之金石史于奕正之金石志葉封之嵩陽石刻集  
記皆嗜古之士其書予家皆有之今得此書四部  
書庫中為不寂寞矣

向從禾中朱翰林竹垞所見南昌王孫厭原山人  
所刻古鐘鼎款識乃自石本臨摹以授黎棗者古  
雅不減宋槧若得之以成雙璧可敵十五城矣年  
已知命書癖尚爾佛家所謂結習者非邪

### 跋沈文端公家書

右歸德沈文端公家書一通語語聖賢忠恕之旨  
予方欲續明名臣言行錄因從牧仲比部借歸手  
錄藏之然以文端敬慎如此而猶不免四明之忌  
妖書之獄震動天下吁可畏哉康熙十七年夏五

### 跋祝枝山書

祝京兆書原本晉人為明代之冠世所傳類顛素  
草書者皆贗也予在廣陵一士夫家見京兆家書  
十餘紙道美圓勁與此略相似信為希有至八詩  
高古頗近韓文公琴操而京兆自序擬於白太傅

秦中吟殆不然也康熙丁巳訥菴學士攜以見眎  
遂題其後

跋邊習詩集二則

順治癸巳曾假閱此集於東癡先生康熙癸卯予  
在揚州作論詩絕句中一首云濟南文獻百年稀  
白雪樓空宿草菲不及尚書有邊習猶傳林雨忽  
霑衣著其事也今歲癸亥在京師復假此集先生  
報書云大水之後藏書盡付波臣獨此集以高閣  
幸免嗚呼豈非神物護持之以待後人之表暴邪  
予因迴思往事自癸巳至癸卯十年自癸卯至癸

亥又二十年忽如旦暮而予且由少而壯由壯而  
老而東癡已稱七十翁矣不勝感歎遂點閱一過  
為錄副謀刊之而歸元本於東癡聊跋數語以志  
歲月

予癸亥跋此集意欲刻之京師而以刊本并元本  
却寄東癡共一愉快不謂是歲東癡歿於江西是  
集因循未付黎棗事之不可料如此言念夙昔為  
之惘然

跋弘正詩鈔

海豐故太宰夢山楊公詩予曩居京師既選其最者



刻梓以傳又得檄餘錄以授其縣人吏侍冰壺王公諾為重刊會其卒此事未果康熙戊辰春以謁太皇太后梓宮至京師於慈仁寺復得是集蓋太宰撰弘正名家之作起空同訖石川凡十卷合檄餘錄觀之公取裁大旨約略具是矣宜其自運之清迴絕俗也

跋張忠定公修扇紀事

邢太僕書今日已極不易得此扇為內大父張忠定公家藏真蹟可稱墨寶至內伯父小司寇書二十年來斷縑零素亦成珍玩矣尺幅中遂兼二絕

良一快也

跋蕙菴二書

此書乃程工部正夫家鈔本卷首題蕙菴者其自號也前一卷曰大內窺觀者山陰王應遴著程跋中所謂中書舍人王雲來者也後一卷曰大內規制宦官劉若愚所著載勺中志略第十七卷合二書觀之有明大內規模如指掌矣予讀南村輟耕錄見所載楊奐汴宋故宮記陳隨應南渡行宮記不禁黍離麥秀之感盛衰興廢何代蔑有此二書亦何可少乎

跋王仲山集

康熙二十年辛酉夏六月梁谿門人劉雷恆震修  
 北來應順天鄉試惠子仲山集及高忠憲公遺書  
 節要時方連雨庭柯增綠叢竹娟好涇川劉舍人  
 子端適送琴魚閱茶屬小疾謝客焚魚啜茗披玩  
 移日

跋故興安知州金公手蹟後

嗚呼此明興安知州復濱金公遺遊擊將軍唐通  
 手書也按公作書為崇禎七年甲戌四月三十日  
 是時大軍在楚蜀賊入漢南秦督洪公疏所云賊

在平利洵陽間者數萬自巴州通江入西鄉者二  
 三萬其自棧道犯城洋者又東下石泉漢陰之間  
 畢會於漢興而旁突商雒秦事大可憂者正其事  
 也是年八月遂有車箱峽受降之舉三秦潰裂竟  
 至淪喪嗚呼賊焰方張不可嚮邇名郡望邑所至  
 瓦解而公以區區忠義之氣激發士民兩全孤城  
 於百萬虎狼之中及其鞠躬盡瘁猶絳衣大冠降  
 神睥睨比於伍胥南門之事嗚呼偉哉可不謂忠  
 乎公歿四十餘年而仲子會公壬戌舉禮部第一  
 入翰林與予為同官予因得拜觀公手蹟而恭跋

三才卷三  
數語其後亦以見天之報施勞臣有以也

跋張忠定公題射鵬圖

張忠定公為叔祖季木考功題射鵬圖一則書畫  
之下方此畫今歸淄川王氏予丙寅冬十一月有  
事淄川從王氏書齋壁上見之手錄以歸雪夜適  
觀此帖輒再手書於末公古文極有法度赤牘跋  
尾單詞片語皆有坡谷風致今遺集未刊每念及  
輒為憮然如此吉光片羽皆可寶也康熙丙寅嘉  
平謹記於樵唱軒時雪夜漏下二鼓

跋自書宋人絕句

雪二日夜乍晴上嘯臺東望林木蒼茫宛然范寬  
倪迂之筆會樵唱軒落成初移筆研几榻燭下作  
書寄內兄賓公山中書竟偶錄此詩地爐楸棗燈  
火青熒歲暮風味恨不與賓公同之也

帶經堂集卷五十

漁洋文集卷二

帶經堂集卷五十一

歙門人程哲校編

新城王士禛貽上

漁洋文十三

謚冊文 諭祭文 擬碑文 奏疏 紀恩錄 日記

孝昭皇后謚冊文

時官翰林院侍讀擬上

維康熙十七年歲次戊午三月日

皇帝制曰朕惟乾道成能實藉坤元之順君臨作則允資內助之賢故媯水嬪而虞德攸隆洽陽合而姬圖斯永逖觀載籍代著芳徽惟懿德之堪垂爰嘉名之是錫用揚休於彤管庶紀美於青編皇后鈕祜盧氏誕毓高門夙昭令德聿襄宸極正

三五  
位中宮淑慎性成早著思齊之譽溫恭天賦允彰  
克順之休六宮師陰教之修萬國戴母儀之重視  
龍樓之寢膳色養有加弘蘭殿之慈祥恩勤罔替  
誠以廣孝每蘋藻之時勤儉以成仁却綺紈而弗  
御欽承罔斁首薇垣之四星裨益弘多作椒庭之  
一鑑方謂永資柔淑何期遽邈音徽禕翟長辭珩  
璜永隔朕躬悽惻臣庶悲哀思道溥而化光儀型  
未遠爰紀功而昭德典制攸崇鴻號誕膺黝章寵  
錫特以冊寶謚曰孝昭皇后於戲令聞聿彰奕禩  
頌珪璋之媿芳規勿替千秋垂琬琰之華靈其來

思承茲眷命

諭祭天妃文

時官翰林院侍讀

制曰國家懷柔百神式隆祀典海嶽之祭罔有弗  
虔若乃明祇効靈示天心之助順滄波協應表地  
紀之安流聿弘震疊之威克贊聲靈之濯豈繫人  
力實藉神庥不有褒稱曷彰偉伐惟神鍾奇海徼  
綏奠閩疆有宋以來累昭靈異頃者島氛不靖天  
討用張粵自禡牙逮乎奏凱歷波濤之重險如枕  
席以過師潮汐無虞烝徒競奮風飈忽轉士氣倍  
增殲鯨鯢於崇朝成貔貅之三捷神威有赫顯號

三万字八  
宜加特封為護國庇民妙靈昭應弘仁普濟天妃  
載諸祀典嗚呼坎德合符永著安瀾之績離方作  
鎮益彰重潤之休特遣禮官脗修祀事惟神鑒之

諭祭鑲紅旗副都統佐領阿爾虎文

制曰朕惟敵愾疆場臣子既歿綏而授命垂名金  
石朝廷爰加賻以褒忠故戰功曰多聿重司勳之  
掌而大烝以祭允隆典禮之文苟臨敵而不有其  
身宜闡幽而永傳諸後爾副都統佐領阿爾虎名  
著折衝才優禦侮頃以滇黔不靖負固長沙戕我  
人民勞我師旅特簡上將往佐中權奮螯弧以先

登威龍言羣醜援枹鼓而誓衆勇冠諸軍帷幄資其  
贊勦士卒同其甘苦方欲銘功衡嶽殄逆湘川何  
期貔虎之雄才竟遭蛇豕之肆毒大星夜隕櫪馬  
皆驚苦霧晨迷跼鳶忽墮壯心弗遂未全消六詔  
之烽烟英氣長存猶足開五溪之瘴癘式頒葬祭  
之典用賁泉壤之輝嗚呼宣力戎行生作爪牙之  
寄捐軀國事歿增箕尾之光靈其來思承茲寵渥  
諭祭 太子少保正白旗漢軍副都統徐大

貴文

制曰惟國家戡定禍亂必有將帥之臣克敵果毅

三力五十八  
者定厥功故生則享其榮歿則致其哀典至渥也  
爾原任太子少保正白旗漢軍副都統徐大貴早  
從征伐宣力累朝方王業肇基已著松杏之績洎  
大統旣集式建太原之勲轉戰中州長驅江左兩  
浙之鯨鯢克靖八閩之蛇豕潛消屢奏膚功游登  
崇秩引年而退猶殷求舊之懷賈志以終不愧易  
名之典用頒葬祭以慰幽冥於戲竹帛永存惜老  
成之徂謝綸綍下賁昭恩禮於始終爾靈有知尚  
其祇受

擬鑲紅旗副都統佐領阿爾虎碑文

官翰林  
侍讀作

制曰朕惟成敗不可論人臨難乃觀其大節死生  
同歸報國捐軀尤惜夫貞臣彤弓之鐘鼓猶懸寶  
劍之鋒鉞頓折在道路猶為隕涕豈廟廷無以酬  
庸爾副都統佐領阿爾虎智鄙全身勇思授命值  
潢池之盜弄毒我衡湘致鼓角之時鳴勞汝將士  
爾職維副帥志在先登乃探甲而疾趨期滅此而  
朝食使其壯猷克展不難成洄曲之功何期逆孽  
猶張竟未奮澠池之翼矢著面上驚看不動之萬  
春刀置鞞中久作誓歿之光弼雖老謀居要思擒  
賊而擒王乃猛士臨危恥辱身以辱國況當鼓鞞

三〇七六  
之會益深拊髀之思是用錫之葬祭謚曰敏壯其  
原官如故嗚呼惜壯志之難酬忠魂未泯思膚敏  
而不復烈氣如生被以榮名尚破敵人之膽垂諸  
信史永激壯士之肝

擬副都統佐領阿爾虎碑文 第二稿

制曰朕惟宣威闡外奏凱師中此師武臣之責也  
即不幸而效節疆場見危授命其於殺身成仁之  
義亦無愧焉爾副都統佐領阿爾虎久諳六韜夙  
嫻三略值烽燧之不靖毒我衡湘致鼓角之時嗚  
勞汝將士爾職惟副帥志切同仇乃擐甲而疾趨

期滅此而朝食使其壯猷克展當銘績於旂常不  
謂逆孽猶張竟隕身於鋒鏑逖稽載籍死於王事  
則賞之能執干戈以衛社稷則春秋予之睠懷匪  
躬之臣爰賁易名之典是用錫之葬祭謚曰敏壯  
嗚呼白刃可陵知忠心之未泯碧血雖化思烈氣  
以如生被以榮名足慰貞臣之魄勒諸堅石永激  
壯士之肝

擬 太子少保正白旗漢軍副都統徐大貴

碑文 官翰林  
侍讀作

制曰朕撫有寓內凡百爾臣工勤勞王家者朕未



三十四十三  
嘗忘其於厚終之典曷有靳焉爾原任太子少保  
正白旗漢軍副都統徐大貴久從戎事累立戰功  
爰自偏裨拔之亞帥念其久勞疆場俾遂引年溘  
焉告終良用悼惜式命有司予葬祭如禮謚曰勤  
果嗚呼謚以易名古之制也聞謚知行禮之經也  
修官之勤致勇之果惟爾有焉用勒豐碑以光幽  
壤以有聞於來世不其休與

恭請酌定先師祀典疏

國子監祭酒臣王士禛謹奏為恭請酌定先師  
祀典以光一朝之制度以垂萬世之法守事竊

惟聖莫盛於仲尼禮莫大於祀典故凡受命之君  
莫不奉以為師崇其秩祀我皇上親政以來丕  
崇文教臨雍釋奠誠以道隆則從而隆之不拘乎  
其位也臣考之前代自漢高帝始以太牢祀孔子  
至唐宋元而隆以王號明成化弘治間尊以八佾  
十二籩豆雖歷代因革損益不同要以至聖之  
道歷久而彌尊故崇祀之典有隆而無替其改大  
祀而為中祀則嘉靖九年張孚敬之議也伏思孔  
子德侔天地道冠古今堯舜禹湯文武得孔子而  
道統不絕於見聞君君臣臣父父子子得孔子而

倫彝不泯於宇宙自生民以來未有若斯之盛者也乎敬之意不過以孔子生未得位不當舞八佾不知以位言之則孔子非但不得舞八佾并不得舞六佾乃歷代之君相與尊崇之有加無已者以道德不以位也且禮祭從主者以天子而祀其師自當用天子禮樂我皇上文德武功超邁隆古褒崇正學誅斥異端作君作師直接堯舜以來之道統則議禮制度考文以上軼百王下垂億禩此其時矣伏祈 勅下禮臣及廷臣集議 先師祀典籩豆樂舞酌采成化弘治年間儀制俾一百五

十餘年闕略之禮煌然復昭於 聖世尊師重道之盛典將垂範於無窮矣為此具本謹具奏 聞

請正從祀諸賢位號疏

國子監祭酒

臣王士禎謹

奏為請正從祀諸賢

位號以重大典事竊惟 文廟之祀從以四配十

哲兩廡諸賢凡以紹述心傳功在萬世也 臣詳閱

會典諸書竊見從祀諸賢諸儒名號位次尚有未

當有宜一并釐正者敬為我 皇上陳之十哲之

位不稱名而稱子是已但自明嘉靖間議去封爵

之後四科之內稱冉子者凡三殊難辨識兩廡諸

賢諸儒則直書其名而不稱子視十哲何遽懸殊  
臣愚以謂宜將神位俱稱先賢先儒某子之位而  
以諱注其旁以昭尊崇之意者也至宋代周敦頤  
程顥程頤邵雍張載朱熹六子闡明絕學遠紹洙  
泗之傳實超前代諸儒明崇禎間遂將六子改稱  
先賢臣等竊以躬及聖門者槩稱先賢私淑者槩  
稱先儒此以時代論非以造詣論也今既改稱先  
賢未敢輕議但位諸漢唐諸儒之上於世次殊有  
未安又諸賢諸儒位次會典闕里志諸書所載與  
今太學神位互有不同并宜詳議妥確通行天下

學宮著之 本朝會典以垂永久者也伏祈 睿  
鑒勅下禮部議覆施行為此具本謹具奏 聞

請增從祀理學真儒疏

國子監祭酒

臣

王士禎謹

奏為請增從祀理學

真儒以光大典事竊惟

至聖之道萬古為昭兩

漢以來諸儒凡發明經傳踐履純正者皆得從祀  
兩廡俎豆千秋典至隆也臣查現在從祀先儒外歷

代諸儒有功聖門尚有當酌議增祀者敬為我

皇上陳之漢儒功在傳經如書詩春秋三禮授經  
諸儒皆已從祀而易獨無之按田何當漢初授易

實為聖門商瞿嫡系此漢儒之當補祀者也鄭康成博稽六藝所著詩禮諸經百餘萬言史稱純儒唐宋以來皆列從祀明嘉靖間始以張孚敬之議改祀於鄉公論久鬱此漢儒之當復祀者也程門弟子首推尹焞先儒稱其學窮根本德備中和考其出處本末毫無可議朱子之後推何基為正傳其學以立志為先居敬為要於大學中庸太極通書西銘皆有發揮此宋儒之當從祀者也至於明代理學實肇於霍州學正曹端其學以誠敬為主力闢邪說薛瑄稱其質純氣清理明心定為有明

理學之冠禮部尚書章懋由博反約斂華就實其學粹然一出於正難進易退天下仰之國子監祭酒蔡清學以六經為正宗以四書為嫡傳所著蒙引尤見窮理之功禮部侍郎呂柟篤志聖賢之道其講學之要曰文必載道行必顧言左春坊贊善羅洪先以躬行之實學闡良知之真傳安貧樂道有簞瓢陋巷之風刑部侍郎呂坤以理學為經濟有體有用所著諸書皆鑿鑿可見施行以上六人操履篤實咸有著書發明聖道此明儒之當從祀者也又絳州貢生辛全生值明末力以正學為已

任著書甚富以時代稍近未敢輕議合無 勅下  
該地方官徵其遺書備 乙夜觀覽或亦可仰裨  
聖學之萬一也伏祈 睿鑒勅下禮部議覆施  
行為此具本謹具奏 聞

請修經史刻版疏

國子監祭酒

臣

王士禛謹

奏為請修經史刻版

以裨文教事竊惟列聖道法之傳莫備於經歷代  
治亂之蹟莫詳於史古帝王內聖外王之學不外  
經史而畢具矣我 皇上聰明天縱宵旰不遑猶  
日 御講筵研精經史又以刊刻經書講議 頒

賜內外諸臣典學之勤雖二帝三王蔑以尚矣查  
明代南北兩雍皆有十三經注疏二十一史刻板  
今南監版存否完缺久不可知惟國學版度置御  
書樓此版一修於前朝萬曆二十三年再修於崇  
禎十二年自 本朝定鼎迄今四十餘載漫漶殘  
缺殆不可讀所宜及時修補庶幾事省功倍伏祈  
勅下部議查其急宜修補者早為鳩工俾刊缺  
悉為完書亦仰裨 聖朝文教之一端也至於南  
監經史舊版并請 勅下江南督撫查明如未經  
散軼即行該省學臣收貯儒學尊經閣中儲為副

本於以嘉惠來學未必無補也為此具本謹具奏  
聞

迎 駕紀恩錄

康熙二十八年己巳正月 聖駕南巡視河初八  
日丙子赴德州迎 駕是日抵章丘宿焦進士毓  
棟所初九日次龍山候淄川唐檢討夢賚同發初  
十日午次濟南知巡撫錢中丞珏尚未行晚宿馬  
賽十一日宿平原十二日午次黃河厓途遇總河  
王少司馬新命知是日 駐蹕阜城司馬得 旨  
前行輕裝介馬僉從纔五六人風塵中數語匆匆

而別憶乙丑奉 命祭告南海與司馬晤於金陵  
得悉 皇上躬謁明祖孝陵始末倏忽四載今又  
以迎 鑾之役相遇于此亦奇緣也晚至德州孫  
少司馬光祀任少司寇克溥蕭侍讀惟豫田編修  
需孫檢討勳陳副使洪諫李比部浹前後見過比  
部邀宿其第聞武定相國李公之芳至十三日早  
晤相國遂至四里屯迎 駕先是巡撫藩臬諸臣  
至劉智廟鴻臚卿承 旨令于四里屯候 駕諸  
臣赴寺報職名畢未刻大風 駕至諸臣跪迎道  
左 上駐馬親詢衍聖公孔毓圻大學士兼吏部

尚書李之芳安好再詢巡撫都御史錢珏兵部右侍郎孫光祀等幾時到此皆恭對上又詢按察使王樑濟東道叅議陳俞侯提學道僉事任塾姓名籍貫巡撫臣珏出班以次恭對訖駕行有旨遣鴻臚卿宣諭臣之芳臣光祀臣士禛三人隨駕遂上馬扈蹕行上至行宮臣隨行聖公諸臣啓奏見朝行三跪九叩頭禮以次恭候聖安畢上遣侍衛傳問馮大學士何以未來臣之芳奏聞大學士馮溥有病又問馮大學士原籍距此遠近臣光祀奏馮溥原籍青州府去德州六百

餘里侍衛入奏又傳問馮大學士患何病臣光祀奏不知何病但聞行動須人扶掖臣士禛奏馮溥今年八十一歲大抵是老病入奏又傳問侍郎王天眷幾時病故係何病臣之芳奏聞在去年五月不知何病回奏訖良久禮部左侍郎翰林院掌院學士庫勒納同侍衛三人捧出上尊玉食宣諭衍聖公孔毓圻大學士李之芳巡撫都御史錢珏兵部侍郎孫光祀詹事府少詹事兼翰林院侍講學士王士禛總兵官曹應鵠布政使衛旣齊等七臣云此皆上用之物因卿等七人昔在京師皆嘗

蒙賜上用酒饌故特頒賜即如常常隨朕身邊一般臣等啓奏 皇上隆恩異數自來廷臣所希覲舉家奕世頂戴 聖恩啓奏謝 恩有 旨行宮門外行禮隨三跪九叩頭謝 恩訖各歸寓更餘鴻臚卿傳 旨巡撫錢瑀與大學士李之芳侍郎孫光祀詹事王士禛伊等係文職大臣恐在後擁擠隨駕不及四人可先行在濟南近城候駕被命即行不及與檢討相聞五更抵曲律店小憩十四日遲明過平原途遇相國連騎行晚宿禹城南二十里舖聞 駐蹕平原縣南七里十五日上

元抵濟南孫司馬約宿其第燈火甚盛邀同行聖公小集相國宿西關不至是日聞 駐蹕齊河縣晏城鎮十六日卯刻 駐蹕黃岡早膳巳刻至濟南府 上乘白馬張御蓋黃童白叟夾道歡迎十餘里不絕臣等跪迎於十王店道左 上駐馬大學士臣之芳奏昨聞 皇上有旨蠲免山東二十九年通省錢糧浩蕩洪恩振古所無臣等及萬姓均霑實惠云云巡撫臣瑀奏 皇上蠲免錢糧上諭臣即連夜通行曉示通省臣民共戴 聖恩上云民為邦本本固邦寧臣等隨於班次三叩頭



謝恩訖 駕幸趵突泉入自西門至巡撫公署  
 觀珍珠泉 御書作霖二大字賜撫臣珏由北水  
 門閱城出自南門有 旨巡撫藩臬三臣隨 駕  
 至泰安州臣毓圻臣之芳臣光祀臣士禎送 駕  
 于乾石橋未刻 駕至駐馬問大學士之芳年幾  
 何奏臣年六十八歲又問精神尚好麼奏臣病稍  
 愈精力覺衰問侍郎光祀年幾何奏臣年七十六  
 歲問臣士禎何未入京臣奏前以丁父憂在籍  
 服闋因患怔忡巡撫咨部在籍調理又問今可好  
 些麼臣奏調理已漸好又問幾時入京臣奏

再調理好些即入京又問臣奏今歲一定到京  
 上云都起來罷 駕遂行聞是日 駐蹕張夏是  
 日與孫司馬別東歸宿王舍店十七日抵章丘十  
 八日焦氏兄弟留飲觀劇唐檢討亦至出南巡紀  
 事絕句相示十九日抵家恭捧 御賜薦家廟洎  
 先祭酒府君几席然後敢嘗是役也往返十有二  
 日 恩賜上方酒果六種前後蒙 溫旨者四真  
 異數也至於 六飛所臨老穉歡迎不聞警蹕下  
 蠲租之詔嚴供帳刁訟之禁交際餽遺之防行在  
 特設翰林起居注官二員有舉必書尤夔絕中古

以下帝王舉動萬萬也宣付史館自有紀述臣謹

就見聞所及紀實如左傳之世世子孫永誌

聖恩於勿替云正月二十一日前詹事府少詹事

兼翰林院侍講學士臣王士禛恭述

後一年庚午臣士禛蒙 聖恩擢左副都御史一

日於朝班見兵部李侍郎光地言德州 行在宣

賜諸臣後又有 旨召臣士禛入見侍衛傳宣久

之以歸寓復奏奉 旨既回寓罷并記於後

北征日記

康熙二十七年戊辰正月初二日卯刻恭聞

太行太皇太后升遐有 旨臣在籍告假丁憂終養

等京官四品已上來京叩謁 梓宮時士禛以詹

事府少詹事兼翰林院侍講學士奉先祭酒府君

諱家居甫禫初四日抵鄒平縣宿張氏晤寶菴兄

弟初五日晚抵章丘縣宿初六日宿還家店去華

不注二里夜雪作尋止初七日早行望華不注雲

霧羃之僅露其趾晚抵禹城縣二十里舖宿初八

日過平原縣晚宿曲律店是日服闋遙拜先府君

初九日次德州飯畢渡河宿景州初十日過阜城

縣宿單家橋十一日過獻縣河間府河間縣宿新

三十九  
鍾驛逆旅壁有予舊題絕句毘陵毛端士有和作  
頗致聞聲之思十二日過任丘縣昔奉使祭告  
南海與今副都御史鄭公山公憩邑中李氏園令  
鄧君文源來謁能吏也過趙北口晚宿雄縣公孫  
瓚易京也瓚與子續書曰素氏之攻狀若鬼神衝  
梯舞吾樓上鼓角鳴於地中今有易京樓十三日  
過白溝河新城縣宿三家店得同年前祥符令毛  
會侯書十四日過涿州琉璃河晚宿良鄉縣十五  
日四更起行晨過盧溝橋范石湖詩草草輿梁枕  
水低今石橋金明昌中造也辰刻入彰義門隨赴

吏部報名尚書說巖陳公侍郎容齋李公南溟張  
公邀飯火房飯罷入朝坐班午門外晚宿趙編  
修伸符舍十六日晤同年前兵部侍郎孫公作庭  
孫以初二日行先予至十七日孫光祿孟滋邀飯  
十八日聞前左都御史蒲州杜公之訃公清忠恪  
慎始終一節卒年七十三予辛卯座主也十九日  
二十日出東便門齋宿相國武定李公過訪二十  
一日黎明上親祭梓宮諸王大臣已下皆就  
列哭奠如禮先是上欲行三年喪諸王大臣言  
官交章數十上勉從之是日釋服二十二日

三万六  
二十三日移寓相國李公邀飯二十四日仍出東  
便門齋宿二十五日黎明上親祭梓宮畢  
駐蹕城外二十六日前相國益都馮公前刑部侍  
郎高公念東至二十七日左都御史徐公健菴邀  
飯德清吳太學卜雄來執贄二十八日兵部侍郎  
張公箸漢邀飯忤庭在坐副都御史鄭公山公見  
過貽所刻文選彙注聞會試展期十日二十九日  
李戶部厚餘邀飯二月初一日晤前副都御史吳公  
銅川於慈仁寺潛江朱載震悔人仁和湯右曾西  
厓治具邸舍二君成均門生也漢陽姪戩孟穀亦

至初二日門人李比部文遠伯含邀飯上海王孝  
廉原來就贄初三日門人衛比部台瑞凡夫治具  
邸舍故相曲沃文清公子候官藍漣公漪門人海  
寧查嗣璉夏重嗣璫德尹秀水朱昆田文益與朱  
湯王諸子畢集乙丑歲奉使南海與藍別於廣州  
藍工畫能詩初四日仁和王丹林來鴻臚卿怡齋  
劉公邀飯初五日晤前少詹學士涓來兄至自金  
陵初六日吏侍李張二公邀飯初七日兵部尚書蒼  
巖梁公邀飯初八日陝西督學許僉事生洲寄石  
墨鐫華秦州朝邑諸志初八日初九日大冶相國

罷既聞武定李公亦致仕初十日忤庭歸里以翰林簡討衛爾錫既齊為山東布政使衛漪氏人在詞林建言謫判霸州政為三輔之最以外艱歸上巡幸畿內廉知之丙寅秋特諭原官起用至是服闋入朝遂有是命伸符編修邀飯謝比部方山在坐十一日晤同年前工部尚書杜公肇余自浙至晚邀南海梁藥亭佩蘭宣城梅耦長庚飯二君故人也以公車至侍講學士彭公羨門以太皇太后輓詩見示凡夫以其先文清公文集來屬序十二日同年前左都御史徐公立齋邀飯長

椿寺同集者相國馮公刑部侍郎高公令兄健菴都憲是日聞兵書真定梁公入相容齋擢工部尚書晤同年前兵部侍郎楊公以齋自浙至十三日或問蟹舍二字所出按說郛有蟹略四卷中蟹鄉一則云蟹澤蟹洲蟹浪蟹穴蟹塚蟹窟蟹舍高似孫有松江蟹舍賦十四日閱李川父嵩渚集游盤谷記云愿行實無考新舊唐書列傳皆無之按愿即西平王長子歷官河中等五鎮節度使卒贈司空唐書有傳川父號稱博雅何疎於考證如此聞故友武進董侍御玉虬之訃董晚注三禮成癸亥

歲曾寄予數篇故工部尚書湯公潛菴撫吳欲為  
奏進未果永城李孝廉灼然介冉覲祖來執贄冉  
字永光中牟人先考功兄癸卯所取解元也是日  
禮部啓奏叩謁梓宮在籍諸臣自大學士馮公  
已下十五人其大學士杜公已下八人先到京者  
竟未啓奏蓋先到即隨朝班陪祭反忽之也十五  
日赴吏禮二部請為啓奏同至者前左都御史劉  
公魯一遷安人年七十七矣聰明如少壯人家藏  
弄書畫鼎彝之屬最富世號精鑒朱檢討竹垞過  
訪攜示唐撫言足本凡十五卷宋嘉定中柯山鄭

昉刻也又言倪檢討雁園嘗得宋刊十家宮詞雕  
版極工王建詩太平天子朝元日宋本作朝迎日  
亦新異可喜竹垞近著日下舊聞三十卷覈而博  
屬予為其序嘉善陳鉞投詩五十韻故人子更之  
子十六日念東歸里晤銅川中丞語皆田園丘壑  
銅川沁州人好古博雅以兵部左侍郎張公箸漢  
知貢舉時三宗伯為言官論列用兵部非故事也  
主考官大學士宛平王公左都御史徐公健菴兵  
部右侍郎成公愚崑左副都御史鄭公山公也吳  
舍人冰持邀飯桐城人同年河南督學五厓之弟

三五九  
坐中談浮渡山之勝十七日晨雪作尋止前內閣  
學士韓公元少見過云即日南歸銅川中丞過訪  
流連話別云亦以次日西歸矣竹垞見借宋僧文  
瑩玉壺清話十卷其第九卷為南唐李先主傳云  
吳檢討志伊著十國春秋引書數十種獨未及此  
十八日工書李公容齋邀飯在坐者涓來詹學前  
工部杜公辭不至布政使衛公爾錫海寧陸處士  
冰修先後過訪冰修臥病都下將附兵侍楊公舟  
南歸宛平姪源以古文來質史論簡嚴不減少游  
後來一作手也十九日謁竹垞求撰先祭酒府君

墓碑程舍人松臯邀飯故太常卿其相先生子錢  
處士飲光在坐述將樂玉華洞之奇同鄉馬右實  
鹿芝陽二侍御邀飯聞以刑書張公素存為兵部  
尚書二十日門人宜興陳枋貽其從叔其年檢討  
遺集其年弟安平令宗石刻此集屬予序請至再  
三未暇報也聞以少詹學士慎菴弟為內閣學士  
兼禮部侍郎晚徃送冰修以齋留飯至夜分夏重  
德尹在坐二十一日禮部啓奏得 旨回籍晤前奉  
天府府丞姜公定菴自浙至二十二日竹垞與姜  
徵君西溟見過西溟出示遊上方山詩李編修紫

二九七二  
瀟湘文卷之三  
二  
瀾邀飯馮舍人大木在坐是日有 旨大學士杜  
公馮公 陛見二十三日方山邀飯紫瀾大木伸  
符在坐讀鄉前輩許襄敏公贈岳蒙泉詩有云道  
上鈎衣蒼耳子風前聒客白頭翁公詩世不多見  
此殊可誦夜歸作悔人詩序燭屢見跋漏下四十  
刻矣二十四日門人安邑丞陳奕禧子文寄司馬  
文正公集及所著皐蘭載筆益州于役記子文工  
詩善書浮湛下僚九載予報書云譬噉諫果當是  
餘甘回齒頰時矣竹垞邀飯古藤書屋食鮓魚半  
翅甚美觀米氏研山峰巒潭洞甚奇有寶晉齋三

篆字襄陽米氏世珍印云其曾大父文恪公得之  
新安許文穆公家悔人凡夫德尹伸符孟穀在坐  
令子文盎是日南歸二十五日過慈仁寺市買得  
舊刻山海經交泰錄二書涓來詹學見過話別令  
子子重吏部過別贈爐扇蘭亭婁縣姜遴上海  
俞麟徵東陽李鳳雛來執贄西溟凡夫大木悔人  
孟穀先後至容齋尚書餽贐辭不獲受一卮晚相  
國馮公使來約以明日行是日公同寶坻杜公  
陛辭各賜綵幣五表裏 本朝閣臣恩禮始終如  
二公者不多見也二十六日凡夫復至餽贐不受



三十九十二  
右實伸符悔人德尹孟穀來遂發晚宿寘店馮公  
先至二十七日過涿州訪前司業鍾山劉公不遇  
予昔官祭酒與劉共事者四載晚宿新城縣過馮  
公寓述昨 陛見既出 傳諭問向服至寶丹否  
對曰臣向實服之今不服數年矣亦不測 上何  
以知之也二十八日大風晝晦過雄縣宿鄭州廢  
城唐莫州宋鄭縣也邢子顥三郡記云顥項所造  
順治壬辰乙未間公車經此鞠為茂草今萬瓦鱗  
次矣二十九日大風過任丘縣車中讀素宏漢紀  
永初五年謁者劉珍上言皇太后宜入宗廟交獻

事下公卿僉曰宜如珍言明年正月太后初親祭  
於宗廟與皇帝交獻大臣命婦相禮儀竊歎漢庭  
公卿多明經術何無一人執奏折其非者宋薛簡  
肅公一言章獻后遂不入太廟度越漢公卿遠矣  
晚宿河間府夜微雨尋止三十日風息過獻縣宿  
富莊驛三月初一日早行過阜城縣景州宿劉智  
廟得家書初二日遇鍾山司業班荆數語而別過  
德州唁督糧道胡少參智修座主故吏部侍郎宛  
委公子也晚宿平原縣分巡兗東道李僉事浣廬  
見過縣令李瑤來故相國高陽文勤公從子也初

三日過禹城縣始見柳花杏花衛河以北所無也  
 午後微雨晚宿馬寨初四日馮公將往灤口晨詣  
 別行二十里望見雒山亦曰項之望見華不注山二  
 山空青縹緲如尹邢相照濟水間之齊城水有二  
 派城中明湖水出水門合趵突泉水北流經灤口  
 入大清河是為灤水亦曰濟水城東門外歷泉水  
 合南山諸水經華不注東流入小清河舊設七十  
 二閘歷章丘鄒平長山新城高苑博興樂安諸縣  
 入於海自劉豫堙小清故道久闕今湖水出水門  
 七分北流三分東北流其東北流者至雙橋閘合

歷泉水至華巖宮前北流亦入大清河自水門舟  
 行尚可達華不注三齊記云歷水出歷祠下泉源  
 競發與灤水同入雒山湖是也晚宿十里舖在龍  
 山西初五日過章丘縣經許山灤漁舟十餘往來  
 水雲間湖中有墨王亭晚至鄒平縣宿寶菴齋中  
 初六日巳刻抵舍是行往返凡六十二日

紀琉球入太學始末

康熙二十三年冊封琉球翰林院檢討汪楫中書  
 舍人林麟焟等疏言中山王尚貞親詣館舍云下  
 國僻處彈丸常慚鄙陋執經無地嚮學有心稽明

洪武永樂年間常遣本國生徒入國子監讀書今願令陪臣子弟四人赴京受業云云事下禮部部覆史載唐貞觀中興學校新羅百濟俱遣子入學琉球自明初始內附會典載大琉球國朝貢不時王子及陪臣之子皆入太學讀書禮待甚厚又載洪武永樂宣德成化間琉球官生俱入監讀書今該國王尚貞以本國遠被皇仁傾心嚮學懇祈使臣汪楫等轉奏願令陪臣子弟四人赴京受業應准所請聽其遣陪臣子弟入監讀書云云時予為祭酒咨覆禮部略云查太學志載洪武二十五

年秋琉球國遣其子及陪臣之子日孜等入監命工部給羅絹為秋衣冬琉球中山王遣其舅仁悅慈等至永樂二年琉球中山王從子三五良疊等九人以謝恩至奏請入監給賜一如洪武中故事令工部建王子書房於監前以處之三年琉球山南王遣寨官子李傑至四年中山王遣寨官子石達魯等六人至其後李傑石達魯等每在監三年得乞歸省九年中山王遣王相之子懷得寨官子祖魯右至十一年遣寨官子周魯等三人至是年有奏歸省者命禮部厚賜以榮其歸是後乞歸省

三九  
或命候其使者還國以行永樂以後至於正德常  
三四遣嘉靖五年中山王遣官生蔡廷美等四人  
至十一年歸國十七年遣梁炫等四人至二十三  
年歸國尋又遣蔡朝用等五人至今在南雍處以  
光哲堂歲時給衣物如例嚮慕文教琉球於諸國  
為最篤國家待之亦為最優云康熙二十七年琉  
球國王遣耳目官魏應伯等恭進朝貢方物又遣  
陪臣子弟梁成楫鄭秉鈞阮維新蔡文溥等四人  
同貢使赴京入監讀書於正貢方物外敬加屏風  
紙三千張嫩蕉布五十疋三十一年成楫等乞歸省

詔同貢使歸國仍命禮部賜宴給賞如貢使  
例

帶經堂集卷五十一



二五二

帶經堂集卷五十二

歙門人程哲校編

新城王士禛貽上

漁洋文十四

山錄

小志

凡例

長白山錄

長白山在濟南鄒平縣西南本屬長山縣縣所得名也高二千九百丈周六十里晏謨述征記曰山巔雲雨常白故又名常白司馬子微洞天福地記第六十一長在山在齊州長山縣故又名長在抱朴子曰長白泰山之副岳酉陽雜俎曰古肅然山也史記封禪書元封元年四月乙卯封泰山丙辰

三十四  
禪泰山下趾東北肅然山今以地理考之山在泰  
山東北相距三百里安得乙卯封泰山丙辰禪肅  
然若是速耶金史云肅然山在萊蕪縣萊蕪古嬴  
地在泰山東百二十里封禪書之言信矣按長白  
山見諸史志者魏書在東魏郡博平縣劉宋僑置  
縣也隋書在章丘縣金史在章丘長山二縣唐元  
和郡縣圖志屬淄州長山縣宋太平寰宇記屬齊  
州章丘縣今則連峰沓嶂跨四縣之境北去鄒平  
而近東北去長山而遠西章丘南淄川實海岳之  
奧區仙靈之窟宅今撫其著者略見於篇

會仙峰山之最高峰也形若覆敦上有金母祠  
上書堂在峰之南有書堂寺寺門巨石環抱如屏  
西有范公泉相傳宋范仲淹讀書處

貓頭狻猊二峰一在書堂西一在書堂南

南向東折曰蘿谷最險峻盛夏積冰雪

又東南曰摩訶峰高與會仙峰埒上有浮圖精舍  
其北大壑限之東曰回路谷德會水出焉

又南曰桃花谷曰種金頂曰水尖頂

太湖山在長白之南上有石室及敗漆船記云堯  
時物

右長白山南嶂

老人峰在會仙峰之東其人多壽又名黃鵠山  
鍛砧峰形如鍛砧亦名印臺山  
于茲山與長白山斷而復連上有于茲仙翁祠

右長白山北嶂

長白兩嶂之間曰大谷谷有二十四村土沃而泉  
甘嘉木美箭藿靡若鄧林

象山 松山俱在谷中

柳菴在大谷西最深處臨黛溪即德會水也竹林  
檀閣煙島雲林所謂幽幽釋子眇眇禪棲者矣

黃鵠菴

生生菴

會仙峰北有望湖頂下見許山樂

魯泉在望湖頂下林壑清美泉水尤甘有成氏別  
業

唐李菴在魯泉西北二里古有唐李二仙得道於  
此

玉泉菴亦有甘泉

朝陽菴與唐李菴表裏相背

九龍山會仙峰北來之支也其峰有九如神龍蜿

三十七  
蜒至許山灤而止掉尾穹脊昂首奮鬚形容酷肖  
山北孔道曰搭山道曰啞婦口

大谷越嶺而西曰黌山亦名黌堂嶺圖經云鄭康  
成刊注詩書之所生細草葉形似韭俗謂鄭公書  
帶草金元好問濟南行記云鄒平縣南有長白山  
范文正公學舍在焉故又謂之黌堂嶺太平寰宇  
志云黌山在淄川縣東北十里三齊要記云鄭康  
成刊注詩書日棲遲於此當以寰宇志為正  
西為鵬鶚谷  
又西為鳳凰山中有迦谷有翔鳳菴

醴泉寺在黌山北宋范希文斷壘畫粥之處公常  
於寺中得窖金覆之今寺有范公祠南向有寶誌  
公石像刻碑北向碑陰有唐人文字齷齪缺過半按  
史及神僧傳寶誌行游之地皆在建康長白乃拓  
拔魏地而唐碑云陸倕製銘於冢內王筠勒碑於  
寺門題署直云誌公之碑何據邪又洛陽伽藍記  
載後魏有沙門寶公者能預覩三世胡后問以世  
事實公把粟與鷄喚朱朱後為尔朱榮所戕或是  
此寶公未可知也若爾則應稱寶公不應稱誌公  
也



三五十四  
富相山在魯泉東北有乳泉色白宜茗山下遠近  
多紅葉

景相公山在富相山東下有後周中書侍郎景範  
墓墓上有碑

黃山在城東南三里與于茲山南北相望上有碧  
霞宮

翠微遐景二亭皆元安處士所建

山陰為兔柴明右都御史張公別業有超然洞洞  
中有白兔公銅像上有挹翠亭半偈山房西佳樓  
禮部尚書董其昌作兔柴記

李氏嘯園在長白山之陰修竹萬挺有來霞閣俯  
臨潔溪是東谷先生張茂蘭故居

繡江源出長白山南百脈泉元好問詩長白山前  
繡江水展放荷花三十里看山水底山更佳一堆  
蒼煙收不起濟南行記云繡江發源長白山下參  
佐張子鈞張飛卿觴予繡江亭漾舟荷花中十餘  
里樂府皆京國之舊

潔水即楊緒水源出長白山之陽俗曰獺

德會水出摩訶峰下齊乘曰蒙水俗曰沙河

魚子溝水水經注瀧水至梁鄒東南與魚子溝水

合水南出長白山柳

或作柳

泉口即陳仲子夫妻之

所隱也北流注於瀧水

魚子溝曲流至黃山南如月半規日月河多水竹

張氏別業

醴泉在寺東山麓有亭久廢先曾祖司徒府君題

名石碣尚存

許山灤在九龍山西醴泉寺北中多芙蓉菱芡菱

蘆魚蚌之產漁舟虎落交於山麓周迴三十里蓋

灤水之委也灤中有墨王亭乃族祖洞庭別業

其人物於陵仲子碩野王輿地志云齊城西南百

五十里有長白山陳仲子夫妻所隱處太平寰宇

志引之按山在齊城東北非西南也唐張說詩昔

聞陳仲子守義辭三公身賃妻織履樂亦在其中

豈無窮賤苦羞與傾巧同長白臨江上於陵入濟

東我行弔遺跡感歎石泉空

唐長白山人邵貞一武氏革命終身不仕見唐書

元張臨字慎與讀書長白山號長白先生明都御

史張公延登作長白先生祠記

處士安仁甫隱居黃山

仙釋毛真人司馬承禎云長在山在齊州長山縣

毛真人治之

白兔公唐韓翃送齊山人歸長白山詩舊事仙人  
白兔公掉頭歸去又乘風柴門流水依然在一路  
寒山萬木中

于茲仙翁

酉陽雜俎長白山相傳古肅然山也峴南有鐘鳴  
南燕世桑門惠霄者自廣固至此峴聽鐘聲稍前  
忽見一寺門宇炳煥遂求中食見一沙彌乃摘一  
桃與霄須臾又與一桃語霄曰至此已淹留可去  
矣霄出回顧失寺至廣固見弟子言失和尚已二

年矣

又云長白山西有夫人墓魏孝昭之世搜揚天下  
才俊清河崔羅什弱冠有令望被徵詣州夜經於  
此忽見朱門粉壁樓臺相望俄有一青衣出語什  
曰女郎須見崔郎什恍然下馬入兩重門內有一  
青衣通問引前什曰行李之中忽蒙厚命素既不  
敘無宜深入青衣曰女郎乃平陵劉府君之妻侍  
中吳質之女府君先行故欲相見什遂前入就牀  
坐其女在戶東立與什敘溫涼室內二婢秉燭呼  
二婢令以玉夾膝置什前什素有才藻頗善風咏

雖疑其非人亦愜心好也女曰比見崔郎息駕庭  
 樹嘉君吟嘯故欲一敘玉顏什遂問曰魏帝與尊  
 公書稱尊公為元城令然否女曰家君元城之日  
 妾生之歲什乃與論漢魏時事悉與魏史符合言  
 多不能備載什曰賈夫劉氏願告其名女曰狂夫  
 劉孔才之第二子名瑤字仲璋比有罪被攝乃去  
 不返什乃下牀辭出女曰從此十年當更相逢什  
 遂以瑤瑁簪留之女以指上玉環贈什什上馬行  
 數十步回顧乃一大冢什屈歷下以為不祥遂請  
 僧為齋以環布施天統末什為王事所牽築河於

冢

一作桓冢

遂於幕下話斯事於濟南奚叔布因下泣

曰今歲是十年可如何也作罷什在園中食杏唯

云報女郎信俄即去食一杏未盡而卒什十二為

郡功曹為州里推重及死無不傷歎

又云平原縣西十里舊有杜林南燕太上時有邵

敬伯者家於長白山有人寄敬伯一函書言我吳

江使也令我通問於濟伯今須過長白幸君為通

之仍教敬伯但於杜林中取樹葉投之於水當有

人出敬伯從之果見人引入敬伯懼水其人令敬

伯閉目似入水中豁然宮殿宏麗見一翁年可八

九十坐水晶牀發函開書曰裕興超滅侍衛者皆  
 圓眼具甲冑敬伯辭出以一刀子贈敬伯曰好去  
 但持此刀當無水厄矣敬伯出還至杜林中而衣  
 裳初無露濕果其年宋武帝滅燕敬伯三年居兩  
 河間夜中忽大水舉村俱沒唯敬伯坐一榻牀至  
 曉著岸敬伯下看之乃是一大龜也敬伯歿刀  
 子亦失世傳杜林下有河伯家

大唐齊州章丘縣長白山醴泉寺誌公之碑

京大薦福寺奉敕慶綴文沙門玄傘

薦福寺翻經院校勘沙門正智寺都維僧

道寂建此寺

曇花未出庸詎知寂滅之名覺日猶曷嘗識

苦空之相夫金儀下降舍靈淨月之光寶教

旁流雲之潤三車駕化工香不息所

以化身周流於別土神於塵沙或十大聲聞駐

形一萬菩薩納景涼臺觀背嶺以宣慈清辨

起未掩白足佛法之月咸王城

之舍蓋生道境發若不人具諦幢

高者與今此醴泉寺者是宋齊經文師即

身之菩薩遊神境來屆茲山棲託巖阿聿修

禪寂以為此地玄武之分青龍闕四首以開疆據天

齊而劃野却闕二十尚父之闕一居九合一匡齊桓公

之霸國爾其常白山者迺摩天闕一地晦映蔽虧抱

泉石以娛神出雲霞而養性山毛地髮名花將軟

草連芳闕二十人闕二繪闕二形勝闕二招提自後七級

宗圖闕一起舍佉之才五層闕一重標戰勝之門海

目山亭妙相殫於變態虹梁鳥革大壯闕三綵畫闕二

塵凡闕二香闕一水調八斛之闕一風闕一五音之說息心

之輩見流注以超昇迴画之徒仰幽關而悟入時

逢闕二代屬闕三十金林玉闕一寥落幽巖我國家灌頂

四天纂圖千帝以佛乘為為馬用道品為城郭八

方起塔闕二道形九闕一聚鹽情殷闕三十佛闕二此精廬

闕一通堯日三齊族姓向梵境以翹誠四履闕一仰釋

天而矯首又屬中宗孝和皇帝龍興漢道馬入天

經闕二十周法界去景龍二年歲次景子爰有齊州

正智寺都維僧仁万俗姓李字道寂慨茲隳墜抗

表闕一宗天鑒至誠特賜名闕三十否而還泰山靈掩

以重開法俗歡康人神之悅初師之行進表也夢

乘船上山及翌闕一赴朝所川無礙豈非興廢闕一定

通闕一懸期闕二十倣裝東上將闕二州闕二三藏義淨法

師各代高僧天下重德先奉敕於大薦福寺闕三字律

以闕六字勝緣闕一字城在東倍增闕二十字四闕一字降靈五闕一字德

及將命星發載達京闕十字時有闕三字身闕一字輟絃歌歲

即闕三字以二月八日親率闔境老幼大會新寺表慶

天恩又於闕二字之闕一字尊卑就列雁行齊聽闕二十字忽見

有醴泉闕四字三四尺深淺三尺餘色淨味甘爰符瑞

典挹酌同飲咸覺蠲疴豈不以闕一字福闕一字圓三靈允

答光揚寶闕一字滋液金場故闕二十字上聞闕二字垂感有敕

改名為醴泉寺仍更抽入冊九僧住持行道自玄

波再委闕一字題重開日殿赫而闕一字昇月宮華而桂滿

若乃闕二十八字海精勤以齊深戒月澄空闕二字密霧禪燈

焰室巧避輕風濯闕二字之龍闕一字洗毗闕一字之鳥眼長祛

五住遠効四心刷闕一字鴈以飛雲轡闕二十字捨生之地

續桂闕二字有情根軌足方闕一字鳴金鼓闕一字功不朽流福

無窮斯並先帝之本願莊嚴法師幽贊威神之所

致也又師遊戲生死示闕二十字儼如親對即平時所

將黑大亦繫具闕一字厥闕一字無願不從迺至有患心痛

者但取廟前少土和水服之應時便愈遺形是託

神靈保持由是闕二十字梁寺史傳師本俗姓朱氏金

城人也少出家

闕二字

道林寺僧儉法師為和上業存

禪

闕一字

宋太始初漸彰異迹居止不定飲食無時長

髮跣足每

闕二十  
七字

詞同讖記言不虛發應驗如神或

闕一字視通於北

闕一字

分形遍於南國奇怪忽恍不可殫

論以天監十三年歲次甲午十二月八日

闕二十  
九字

相

奄然示終時有異香

闕二字

芬馥特勅厚加殯送葬於

鍾山獨龍阜仍於墓所

闕一字

開善精舍勅陸倕製銘

於冢內王筠勒碑於寺陰

闕二十  
六字

生及其去也以精

靈度物哀憐庶類福祚皇王且彼託鍾山此依常

白彼葬龍阜此

闕一字

龍臺前王挹風建開善之墳

闕一字

後帝傾

闕二字

醴

至今大唐太極元年歲次壬子

皇帝御天下之三載凡一百九十九年化化之緣

闕二十  
五字

古今無盡明明之德日月彌新其所變現之梗概

闕二十  
七字之闕一字眾所未諒恭敬者隨時受福疑慢者應

念立徵事迹繁夥不可備載當嘉聲上徹先帝令

左臺監察御史宋務先親加檢覆

闕二十  
八字

八正所以

知歸一屬

闕一字

緣獲未曾有

復命倍沃天心刺史

闕二十  
八字

楊元禧分符北極露冕東藩

雨逐於行車仁風

闕一字

隨於轉扇黃金

追鳥跡於上乘想

闕二十  
八字

繩寶地

動天宮薦瑞香園延光帝載縣丞主簿縣尉

闕二十  
八字

字

闕一字



舍

闕四十三字

羣物揚舲彼岸錄事

闕二字

鄉

闕一字

等門滋蘭

字

芽忠信滿於州閭因果

闕一字

於

闕四字

虔命

闕一字

奉

闕三字

九池荷於津通貝樹披春帝王之遺文秩矣金

諸佛之正道通矣迷津路菩薩運載之乘行矣

字

闕八

之

闕二十

況

闕一字

天大造充溢於盡空淨域鴻緣牢

籠於無外昔迦

闕三字

如來垂讚歎之

闕一字

彌勒當

闕三字

表

歌揚之偈若稽古訓式樹碑仍於

闕二十

銘曰義

天兆昧優花未披但迷五蘊孰辨三伊

闕二字

火宅耀

我金儀神足繼軌

闕二字

揚

闕一字

有

闕一字

成觀方

闕二字

載

表靈

闕二字

開

闕二十

網

闕七

燬我寶地壞我金場花殘鷺沼

煙輟龍香霞標歇滅石徑荒涼

闕三字

萬寓乘皇千齡

纂帝日月連

闕一字

飛行

闕一字

契

闕一字

念新

闕五

高

闕二十

標五門玉墀倣感銀

闕一字

輿存

闕五

欲赴天泉

闕一字

規

國德寄誠墳廟傳詞翰墨瑞醴通流嘉祥允塞重

允佛

闕二字

題宸極

闕六

紺軒加

闕二十

沙

闕七

先帝聖靈聿

資神境冥扶默贊分形散影既墓彼山又墳茲嶺

寶鐸雙振金繩共炳化

闕三字

真身永永

闕八

功

闕一字

泉

天

闕二十

宣聞諸典故鐫金鏤玉道該緇素式讚王

猷

闕二字

淨度勒像賢劫刊碑覺路

闕十

開元三年歲次乙卯二月己酉朔十五日癸亥

闕下

大周故銀青光祿大夫中書侍郎同中書門下平章事上柱國晉陽縣開國伯食邑七百戶贈侍中景公神道碑銘并序

翰林學士朝議郎尚書水部員外郎知制誥柱國賜緋衣袋臣扈載奉勅撰

翰林待詔朝議郎守司農寺丞臣孫崇望奉勅書

帝軒轅乘土德之運其臣曰奢龍祝融能辨方域以制區夏帝媯氏禪陶唐之基其臣曰伯夷后夔能典禮樂以和人神上古佐命之道闕五焉三政嗣

興圖史寢盛彌綸輔翼代有其人皆金策丹書絢績功業垂其訓聚而為墳典形其美流而為歌頌陋篆籀之質略我則潤之以闕五之淪朽我則鏤之以貞珉銘以紀功碑以誌行千載之下粲然可觀者其惟神道之表乎故中書侍郎平章事景公諱範皇朝元佐闕二顯德二祀冬十一月薨于淄川郡之私第天子廢視朝軫殲奪之念制贈侍中遣使贈奠飾終之典優而厚闕二詔詞臣闕一文闕一琰盛矣闕三孔悝彝鼎不出廟門杜預豐碑空沈漢水姑自矜于名氏誠未顯于邦家與夫輝煌帝恩導揚休

烈闕八者字可同日而語也闕六綸有直而敘之用不顯

我大君之命臣聞景氏之先出于芊姓從楚王于

夢澤差闕一侍臣畫漢闕一于雲臺丹推名將濟美垂

清惟公故里夫嘉遁絕世高臥于是者足以闕一顯

氣而為闕七生于是者足以闕三而為世傑故公之

先由烈考太僕府君之上曰王父賓大王父閏皆

貞晦不仕介享天爵而巢許闕十仲曰篆公闕四

世闕二聿登相位而申甫之祥著矣昔者聖人之教

天下也本之以仁義制之以經籍是謂人文是謂

人闕六以闕一開物成務者闕四所於此闕二以公輔之

位必由稽古升廊廟之才必以經術顯而公以明

經擢第於春官氏則賢哲之闕六為吏於清陽闕十掾

於高密郡秩滿而闕一授范縣令大鵬之翼鍛北溟

以未舒蟄雷之聲殷南山而不闕一然則闕七子之闕十

通人之才變而順則方圓之量不能局故公之佐

縣政也人謂其勤且潔矣典刑書也人謂其闕八邑

恪闕一以闕八使闕一政闕一而從入者則人謂其賢且能

矣粵若日月之彩得天而大明風雲之期遇屯而

勃起闕十礪闕一璜闕十我大周聖神恭肅文武孝皇

帝建大功于漢室為北藩於魏邦初筮既開得賢

斯盛於是我公闕九而君臣之闕九龍飛在天躬載曜

靈至於霄極皇業肇建制以公為秋曹郎進階至

朝散大夫而闕九萬闕十之樞惟聖人執左契臨萬邦

經久制大命日政之機國之大柄總於樞務者可

謂重矣而公闕九忠而賢闕十公為左司郎中充樞密

直學士尋轉諫議大夫克職今皇帝嗣位之時登

用舊臣而并人乘我大器擁眾南寇親征之舉迺

若奔雷分命大臣保釐闕七于公仍拜貳卿闕九振帝

伐張黃鉞白旄殪羣兇而皆盡參旗河鼓導清蹕

以言旋大稷既已平九服又已定闕四時惟輔臣而

公昌言可闕八聖謨碩望可以鎮流俗爰立之命帝

心允孚六府肇修兵賦元大邦之調用闕五公自立

不回信而有守闕十哉大用逢時洪鈞在手資忠孝

於君父享富貴之崇高而盡悴之勞因成美疢封

章疊上優詔褒稱聽解利權闕一專闕七以列卿歸

第懸車故鄉嗟風樹之忽驚訴昊天予何極見星

而注夕露方多泣血以居晨漿屢絕哀與性盡臥

疾而終享年五十有二闕七觀夫公之行事則其道

也淳而粹克克焉無能稱其言也直而肆謇謇焉

無所忌耿介以自立強幹以自闕一故其仕也闕一

命之卑闕一三闕六无悔吝古人之操何以尚也秉筆

者得無愧於辭矣許國夫人李氏嗣子太廟齋郎

儼信等闕三靈闕一光闕二烝嘗翼翼賢人闕九子事終

之禮佳城閉日長楸篲雲勒銘垂休以示千古其

詞曰

長白蒼蒼溜水湯湯哲人之生逢時會昌哲人之

逝魂遊故鄉闕一高山兮我峨逝水兮驚波闕一而闕一

死闕十山有頽坂水有高岸人何世而弗新善有名

子獨遠猗歟公子時用丕顯

顯德三年歲次丙辰十二月己未朔十日戊申

長白山有明僧宗泐詩帖凡古今詩十五首自題

云持盃過長白宿劉老別業書之永樂二年九月

天台釋宗泐李滄溟跋云此長白名蹟也按泐季

潭以胡惟庸之獄連染免死發隄槎峰與做散僧

渡江至江浦石佛寺示寂事在洪武中而此署永

樂二年謬矣

明戶部尚書邊貢詩朝望長白山暮望長白山山

色有朝暮吾心常自閒

崧少山人張鯤石刻絕句在醴泉寺范祠危閣煙

霞出峰簷麋鹿來春泉落西澗聲遶讀書臺風晝  
 谿楊色煙春崑蕙香人言背絕壑纔是上書堂山  
 護理金窟泉通畫粥廚傳經衣蓋在常伴老龍圖  
 靈刹羣峰合名祠半日游難逢浮海術易集下山  
 愁按鯤釣州人今禹州官副使嘉靖十三年刻  
 古栗老友碑明都御史張公延登書在黛溪側  
 隋來整榮國公護兒之子驍勇善撫士眾討擊羣  
 賊所向皆捷時孟讓王薄眾十餘萬據長白群賊  
 歌之曰長白山頭百戰場十五五把長槍不畏  
 官軍千萬眾只怕榮公第六郎

### 廣州遊覽小志

#### 光孝寺

光孝寺又名法性寺在粵城西北越王建德故宅  
 也孫吳虞翻居此手植訶子因名虞苑又名訶林東晉隆  
 安五年罽賓國曇摩耶舍尊者駐錫曰王園寺劉  
 宋永初中求那羅跋陀三藏始創戒壇梁天監元  
 年智藥三藏自西竺來植菩提樹壇前預識曰後  
 一百七十年有肉身菩薩於此樹下開演上乘達  
 磨初入中國亦止此寺其後五傳至惠能遂開東  
 山法門於此今祝聖殿曇摩遺跡也有米元章書

三世佛名稍北為六祖殿前為菩提壇壇側為髮塔其東南為達磨井西為五祖殿循廊而東為風幡堂堂前有池泓然又東有偽漢鐵塔上有題記稱大漢皇帝大寶十年四角有沙門某某題名繫銜皆金紫大夫檢校工部尚書又東為譯經臺洗硯池房融筆授首楞嚴處西廊復有一塔規製差小題玉清宮使德陵使龍德宮使開府儀同三司內侍監上柱國龔澄樞同女弟子鄧氏三十二娘及大寶六年歲次癸亥字粵城內外古道場以光孝為第一氣象古朴殊乎他刹六朝已還名僧居

此者曇摩耶舍求那羅跋陀智藥三藏初祖六祖

印宗法師波羅末陀

陳刺史歐陽頴請譯佛阿毗曇經金剛般若經無上依經佛性論共四十部

般

刺密諦

譯楞嚴者

仰山通智禪師憨山德清法師天然

函昱禪師同遊黃太史忍菴高廷評謾園屈翁山陳元孝張超然三處士程燕思秀才人賦五言詩

### 六榕寺

淨慧寺舊名寶莊嚴寺蘇長公南遷過此書六榕二大字因名六榕寺今寺額即蘇書也寺有舍利塔梁大同中沙門曇裕建舊有唐王勃碑宋紹聖間寶雞主簿林修重建宗室康州刺史叔盎撰文

塔九層高二十丈廣六丈有奇中藏佛牙舍利當  
修重建時掘得巨鼎藏劍三鏡一同舍利瘞之元  
至正間又增寶珠銅柱之屬憑高眺遠則白雲粵  
秀諸峰皆在襟帶也寺有永嘉禪師證道歌石刻  
禪師謁六祖祖歎曰善哉少留一宿宗門謂一宿  
覺

### 五羊觀

五羊觀在城中西南坡山上有穗石洞五仙祠吳  
立夫南海古蹟記云楚高固時有五仙人人持穀  
穗一莖六出乘羊衣羊具五方色遺穗州人今祠

中五石云是羊化殊不類祠後有崇臺可以眺遠  
其東為三元殿殿前有池片石陂陀一泓出其中  
旁有石刻曰仙人足跡傳會可笑湛文簡公少讀  
書於此有詩刻石同遊者庭表謾園翁山元孝超  
然燕思光孝寺僧月濤南柄

### 海幢寺

海幢寺在羊城南下瀕江水同庭表翁山元孝蒲  
衣淫遊冒雨發舟二里抵寺門木棉方花望如赤  
城之霞寺有鷹爪蘭一林藤本大兩圍榦枝相糾  
花五出初作綠色久之漸黃香與魚子蘭酷似寺



三万甲  
故郭氏園蘭園中故物也有藏經閣極偉麗北望  
白雲粵秀西望石門靈峰西樵諸山東眺雷峰即  
往波羅道也南為花田南漢葬宮人處素馨花產  
此寺為僧今無所建龍象莊嚴甲諸刹然無他奇  
稍宜登眺耳食罷登舟往海珠寺

### 海珠寺

海珠石在江中上有慈度寺宋李侍郎昉英讀書  
處寺有李公祠面丹霞臺下瞰江水北帶羊城佔  
舶漁艇往來如圖畫為粵人競渡之所明盛時豪  
家競以翠毛鶴毳孔雀尾飾船篷用相誇尚其侈

靡如此用兵後築城置戍其上荒落不復振矣有  
吳道子石刻觀音像尚存舟由濠水入魚藻門劉  
鋹時有稻田自海上浮來布衣林楚材見而歎曰  
水魚湫湫予南及宋師至潘美為帥人始悟為潘  
字云飲濠梁別業晤梁秀才無技

### 越秀山

越秀山在廣州府城北城堞因山山分為二東為  
歌舞岡越王臺其西為觀音閣山半為呼鸞道偽  
漢劉龔故蹟也城西為朝臺山南越志云傍江構  
起華館以送陸賈因名朝臺也古蹟記云山巔有

三十四  
達磨泉山踞粵城最高處憑高下瞰遠江如帶目  
盡炎海粵人三月三日九月九日多游於此城堞  
間多榕樹木棉時暮春木棉方花紅照天外亦一  
奇也

### 蒲澗寺

三月初四日勞書升憲副約同忍菴謬園元孝游  
蒲澗寺寺在白雲山麓氣象疎古寺門諸山環抱  
門內二石碣刻宋蘇文忠公詩崔清獻公詞坐禪  
人大韶範成妙叶堂始食蕉子羊桃菖蒲澗在寺  
左太平寰宇志云菖蒲澗一名甘溪南越志云交

州刺史陸肩之所開也襄陽羅友累石澗側容百  
人坐古蹟記云南漢闢甘泉苑南有陸公亭夾溪  
刺桐木棉花開殷艷如畫時久旱細流涓涓出石  
罅中小魚如秧針千百為羣東上尋濂泉寺半里  
許得石澗潺湲有聲涉澗而東樹益蒼鬱水聲益  
清激又半里復涉澗而西澗中巨石敲立騰倚類  
多姿制岸皆笏竹竹盡得寺寺數弓而朴雅絕塵  
老僧與杲居之元孝言郡人陶璜苦子前身寺僧  
道安也因言其從父陳公慧業記前生為廬山僧  
事甚奇寺去濂泉尚里許衆疲矧不能登坐澗石

三才子三  
滄洋文卷一  
三  
蔭竹樹俯聽水聲如鳴琴筑下山遠見漉漉洲  
上浮圖巋上海鰲寺也歸食寺門榕下是日甚暑  
清風灑然山相傳為安期生得道處上有景泰寺  
安期祠

長壽菴

長壽菴在西郭外剏於萬曆間禪人大汕重新之  
汕能詩畫營造有巧思寺西偏有池通珠江水增  
減應潮汐池北為半帆循廊曲折而東為繪空軒  
軒前佛桑寶相諸花叢萃可愛由半帆竝池而南  
緣岸皆荔支龍目池之南為懷古樓高明洞豁其

下為離六堂水木清華房廊幽窈如吳越間寺有  
拈花釋迦像飾以黃金珠玉琕璫瑪瑙瑟瑟之屬  
莊嚴妙好又有銅像云是唐鑄也

南園三忠祠

大忠祠祀宋文信國陸丞相張越國三公其東祠  
南園五先生五先生者孫典籍蕢黃待制哲王給  
事中佐趙御史介李長史德明初結詩社於南園  
此其遺址崇禎戊寅巡按御史葛徵奇葺三忠祠  
并鋟五先生詩於版久之皆廢同年彭吏部襄為  
番禺令復新之祠有池閣背枕河流亦一勝地

三十四  
五言詩凡例

昔荀綽撰五言詩美文其書不傳而昭明之選所錄五言詩自漢迄齊梁甚具學詩者宗焉然其中頗雜四言又公讌應教諸篇率多蕪雜予撰漢魏六朝五言詩視蕭選微有異同至其菁英鮮闕略矣

樂府別是聲調體裁與古詩迥別然漢人廬江小吏羽林郎陌上桑之類敘事措語之妙愛不能割班姬怨歌行卓氏白頭吟被之樂府何非詩耶至曹氏父子兄弟往往以樂府題敘漢末事

謂之古詩亦可故竝多采摭若六朝子夜讀曲等歌悉不載

齊梁以後短句已是短律唐集楊用修五言律祖既有專書茲頗取其警策絕句亦然

十九首之妙如無縫天衣後之作者願求之鍼縷襞積之間非愚則妄此後作者代興鍾記室之評躉矣愚嘗論之當塗之世思王為宗應劉以下羣附和之惟阮公別為一派司馬氏之初茂先休奕二陸三張之屬概乏風骨太沖挺拔崛超臨菑越石清剛景純豪雋不減於左三公鼎

足此典午之盛也過江而後篤生淵明卓絕後  
先不可以時代論矣

宋代詞人康樂為冠諸謝奕奕迭相映蔚明遠篇  
體驚奇在延年之上謝之與鮑分路揚鑣仲偉  
之品於明遠多微詞愚所未解矣

齊有元暉獨步一代元長輔之自茲之外未見其  
人梁代右文作者尤衆繩以風雅略其名位則  
江淹何遜足為兩雄沈約范雲吳均柳惲差堪  
羽翼固知此道真賞論定不誣非可以東陽零  
陵身參佐命遂能劫持一代文柄也

陳朝寥寥孝穆稱首總持流品視徐未宜竝論然  
華實兼美殆欲過之子堅蕪累愧其名矣

北朝魏齊之間顏介最為高唱高教曹短章不減  
斛律金二君可敵南朝沈慶之曹景宗矣邢魏  
之流未強人意劉昶蕭愨踰淮不化亦未易才  
後周寥寥塵得子淵子山二人之才一時瑜亮  
而鍾儀之悲開府為至矣

隋混一南北煬帝之才實高羣下長城白馬二篇  
殊不類陳隋間人楊處道沈雄華贍風骨甚道  
已闕唐人陳杜沈宋之軌非餘子所及也

唐五言古詩凡數變約而舉之奪魏晉之風骨變  
梁陳之俳優陳伯玉之功最大曲江公繼之太  
白又繼之感寓古風諸篇可追嗣宗詠懷景陽  
雜詩貞元元和間韋蘇州古淡柳柳州峻潔二  
公於唐音之中超然復古非可以風會論者今  
輒取五家之作附於漢魏六代作者之後李詩  
篇目浩繁塵取古風未遑悉錄然四唐古詩源  
流可略覩焉

右略論五言升降之變如此卷之繁簡次第雖視  
當時作者輩行篇什多寡然風氣轉移頗示疆  
畛如阮籍別於鄴下諸子左思別於壯武諸家  
叔源列於諸謝何遜江淹冠於沈范諸如此類  
且存微旨覽者遇於意言之外可焉

七言詩凡例

愚撰五言詩竟復鈔古逸漢魏迄唐宋金元諸家  
長句為七言詩若干卷謝太傅問王子猷云何  
七言詩對曰昂昂若千里之駒泛泛如水中之  
鳧此命名所自也

七言始於擊壤歌雅頌之維昔之富不如時予其  
懲而毖後患學有緝熙於光明至臨河歌南山

歌以下其辭匪一皆七言之權輿也鈔古歌一卷若皇娥白帝二歌屬王嘉偽撰則附錄卷末大風垓下肇始漢音至武帝秋風柏梁其體大具曹子桓燕歌行陳孔璋飲馬長城窟行皆唐作者之所本也六朝惟鮑明遠最為道宕七言法備矣鈔漢魏六朝詩一卷梁陳隋長篇頗多而氣不足以舉其辭沿及唐初益流繁縟愚均無取焉

明何大復明月篇序謂初唐四子之作徃往可歌其調反在少陵之上躋矣然遂以此槩七言之

正變則非也二十年來學詩者但取王楊盧駱數篇轉相仿倣膚辭剩語一倡百和是豈何氏之旨哉今略取李嶠以下氣格頗高者得四篇以見六朝入唐源流之槩云鈔初唐詩一卷開元大曆諸作者七言始盛王右丞李東川暨高岑四家篇什尤多李太白馳騁筆力自成一家大抵嘉州之奇隋供奉之豪放更為剗獲今鈔盛唐五家之作為一卷王龍標崔司勳間取一二附之

詩至杜工部集古今之大成百代而下無異詞七

言大篇尤為前所未有後所不逮蓋萬古元氣  
之奧至杜而始發之今別於盛唐諸家鈔杜詩  
一卷

杜七言千古標準自錢劉元白以來無能步趨者  
貞元元和間能學杜者惟韓文公一人鈔韓詩  
一卷李義山韓碑一篇追配昌黎附之卷末  
宋承唐季衰陋之後至歐陽文忠公始拔流俗七  
言長句高處欲追昌黎自王介甫輩皆不及也  
廬山高一篇公所自負然殊非其至者鈔歐陽  
詩一卷

歐陽公見蘇文忠公自謂老夫當放此人出一頭  
地蓋非獨古文也唯詩亦然文忠公七言長句  
之妙自子美退之後一人而已鈔蘇詩一卷文  
定視文忠邾莒矣今略十餘篇附之以備眉山  
一家之詩

蘇文忠公凌蹕千古獨心折山谷之詩數效其體  
前輩之虛懷如是後世腐儒乃謂山谷與東坡  
爭名何其陋邪山谷雖脫胎於杜顧其天姿之  
高筆力之雄自闢門庭宋人作江西宗派圖極  
尊之以配食子美要亦非山谷意也鈔黃詩一



卷

元祐文章之盛推蘇門六君子黃嘗自負其詩在晁張之上顧无咎七言佳處頗得文忠之逸叔用其茨集寥寥無多一鱗片甲殆高出无咎之上議者以為惟陸務觀能髣髴之非過論也鈔二晁詩一卷

南渡氣格下東都遠甚惟陸務觀為大宗七言遜杜韓蘇黃諸大家正坐沉鬱頓挫少耳然竟非餘人所及鈔陸詩一卷

南渡以後程學盛於南蘇學盛於北金元之間元裕之其職志也七言妙處或追東坡而軼放翁鈔元詩一卷中州集載劉迎無黨長句數篇風格獨高附錄

元詩稱虞楊范揭道園自負如漢庭老吏愚數觀學古錄其詩誠非三家所及恨篇什寡耳鈔虞詩一卷劉靜修刻畫遺山間有可采略取數篇附之

元詩靡弱自虞伯生而外惟吳立夫長句瑰瑋有奇氣雖疎宕或遜前人視楊廉夫之學飛卿長吉區以別矣淵穎集宋文憲公所編今略其合

作鈔吳詩一卷

有明一代作者衆多七言長句在明初則高季迪  
劉子高為最後則李賓之至何李學杜厭諸家  
之坦迤獨於沉鬱頓挫處用意雖一變前人號  
稱復古而同源異派實皆以杜氏為崑崙墟近  
日錢受之七言學韓蘇其筆力學問足以赴之  
愚於明詩別有論次此鈔不及云

愚鈔諸家七言長句大旨以杜為宗唐宋以來善  
學杜者則取之非謂古今七言之變遂盡於此  
觀唐人元白張王諸公悉不錄正以鈔不求備  
故也舉一隅以三隅反其在後之君子

帶經堂集卷五十二



